



銜蟬小錄卷五

託喻

仁和孫蓀意秀芬輯

敵狸

公羊傳疏伏雞愛子投命敵狸

贖狸

易林齋貝一作金贖狸不聽我辭係於虎鬚牽不得來

騏驥不如

莊子騏驥驂騑一日而馳千里捕鼠不如狸狴言殊技也

狸膏

莊子羊溝之雞三歲為林相者視之則非良雞然而勝人者以狸膏塗其頸也

牛不如

尹文子使牛捕鼠不如貓狴之捷

雞搏狸

吳子辟猶伏雞之搏狸乳犬之犯虎雖有鬪心隨之死矣

狸腦

淮南子狐目狸腦鼠去其穴

狸頭

抱朴子故老子有言以狸頭之治鼠漏以喙木之護齧齒此亦可以類求也

不議

抱朴子蚊集鷹首則鴈駮不敢喙鼠住虎側則狸犬不敢

議

虎尾不附

抱朴子虎尾不附狸身象牙不出鼠口

用能

韓非子使雞司夜令狸執鼠皆用其能

試於釜竈

說苑驕騾驥天下之駿馬也使之與狸鼯試於釜竈之間其疾未必能過狸鼯也

狸處堂

呂氏春秋窺赤肉而烏鵲聚狸處堂而衆鼠散

百錢狸

說苑騏驥駮耳倚衡負轅而趨一日千里此至疾也然使捕鼠曾不如百錢之狸

狸守鼠

參同契狸犬守鼠鳥雀畏鷓各得其功何敢有聲

雄雞逐狸

靈棋經雄雞晝鳴登屋延頸雌在牆下爲狸所驚絕聲來赴得免損傾

跛貓

東方朔騏驎駮蜚鴻驪騮天下之良馬也將以捕鼠於深宮之中曾不如跛貓

三狸博鼠

易林三狸博鼠遮遏前後死於園城不得脫走

鼠齧狸

鹽鐵論鼠窮齧狸

容頭過身

漢書虞詡疏公卿吳悞容頭過身按貓犬鑽穴頭可容身卽過矣詡蓋以貓犬論之也

縛鼠與貓

朝野僉載牽羊付虎未有出期縛鼠與貓終無脫日

婢似貓

李商隱雜纂婢似貓煖處便住

李後主謠

全唐詩索得孃來忘却家後園桃李不生花猪兒狗兒都
死盡養得貓兒患赤痕南唐近事解此謠云孃謂後主再
娶周后猪狗死謂祚盡戊亥年赤痕目疾貓有目病則不
能捕鼠謂不見丙子之年也

依樣畫貓

幻寄顧虎頭畫人影雖得其神而終是畫香岩樹上話雪
峰望州亭話元沙三種病人話雪岩睡着未夢主人話都
是依樣畫貓兒

五燈會元祖庵主遣與偈曰一補飢瘡了無事來朝依樣
畫貓兒

不捕貓

鶴林玉露蘇東坡云養貓以捕鼠不以死鼠而養不捕之
貓予謂不捕鼠猶可也不捕鼠而捕雞則甚矣嫉視正人
必欲盡擊之非捕雞乎

貓不啜餒

西堂日記貓不啜餒非甘之不至也蟲不生藥裏非蟲之
不足也

驚禽

蘇東坡却鼠刀銘夫貓驚禽晝巡夜伺拳腰弭耳目不及
顧鬢搖於穴走赴如霧碎首屠腸終不能去

稱貓

蘇軾郭忠恕畫贊逢人死貴賤口稱貓陸游詩偶爾作官

羞問馬頹然對客但稱貓

得飽熟睡

東坡寄子由修養帖任性逍遙隨緣放曠但盡凡心別無勝解以我觀之凡心盡處勝解卓然而世之昧者便將頹然無知認作佛地如此是佛貓兒狗兒得飽熟睡腹搖鼻息與土木同當凭麼時可謂無一毫思念豈謂貓狗已入佛地

熊虎不剝

會稽典錄吞舟之魚不啖鰕蟹熊虎之爪不剝狸鼠

木貓

木貓賦惟木貓之為器非有取於象形設機械以得鼠配

貓功而為名

偷食貓兒

蘇軾雜纂

改不得

偷食貓兒

隣舍貓兒

宋王銍雜纂續

易圖

隣舍貓兒

不得

偷食貓兒

愛便

養母

猪雌貓

貓兒頭生活

留青日札今冬筍之已透風有毛者曰貓兒頭又人之幹事不乾淨者曰貓兒頭生活貓頭雖似虎而人不畏也今呼罵達官家人曰貓頭

醉貓三餅

清異錄居士李巍求道雪竇山中畦蔬自供有問巍曰日
進何味答曰以鍊鶴一羹醉貓三餅注謂鍊得身形似鶴
形而以蒔蘿薄荷搗飯爲餅

鼠張貓勢

西湖志餘杭人言舉止倉皇者曰麀麀馬鹿蓋四物善駭
見人則跳躍自竄故以爲喻又曰鼠張貓勢亦此意也

癡貓守窟

性命主旨無一歌曰到此得一復忘一可與元化同出沒
設若執一不能忘大似癡貓守空窟

貓狗是天尊

張亦山銘心訓云人求我朝成暮不顧我求人貓狗是天

尊

馴貓

歲寒堂稿明宦官論且夫宦官亦人耳刀鋸之餘種類殊
則性情異如馴貓癡婦孩童好弄而不知節

徒愛不利

寒夜叢談見隣家貓犬輒撫之狎之便有一種依依膝前
情態然入吾門而殘腥剩骨一無所得雖呼之不至也見
之非呵叱卽鞭逐苟臊羶狼藉恣其飽嚼卽驅之亦不去
故曰徒愛而不利則衆親而不至徒利而不愛則衆至而
不親

如貓伺鼠

法苑珠林我涅槃後當有比丘像似持律少讀誦經貪嗜
飲食長養其身身所衣服粗陋醜惡形容憔悴無有威德
雖服袈裟猶如臘師細步徐行如貓伺鼠

死貓頭

禪林寶訓音義死貓頭此物本是腥臭之物若有具眼納
僧直下承當一口吞之則佛祖之病悉除通身輕快舉僧
問曹山世間何物最貴山云死貓頭爲貴丹霞頌云腥臊
紅爛不堪聞動處輕輕血污身何事杳無人著價爲伊不
是世間珍

南泉斬貓

趙州語錄南泉東西兩堂爭貓兒泉來堂內提起貓兒云

道得卽不斬道不得卽斬却大衆下語皆不契泉意當卽
斬却貓兒子至晚間師從外歸來問訊次泉乃舉前語了
云你作麼生救得貓兒師遂將一隻草鞋戴在頭上出去
泉云子若在救得貓兒

宗門頌古摘珠紫柏頌曰設使南泉不舉刀草鞋何地賣
風騷相逢若問兩堂客鼻直眉橫總姓貓

貓兒捕鼠

指月錄草堂清謁黃龍龍曰子見貓兒捕鼠乎目睛不瞬
四足踞地諸根順向首尾一直擬無不中子誠能如是心
無異緣六根自靜默然而究萬無一失也

中峰頌

廣錄中峰頌云不是死禪是沒師貓兒尾上繫研槌夜深打殺街頭鼠路上行人那得知

風穴頌

羅湖野錄寂音尊者洪公初於歸宗參侍真淨和尚而至寶峰一日詣真淨和尚求決所疑真淨舉風穴頌曰五白貓兒爪距獐養來堂上絕蟲行分明上樹安身法切忌遺言許外甥及游東吳寓杭之淨慈寺以頌發明風穴意寄呈真淨曰五白貓兒無縫罅等閑拋出令人怕翻身逃擲百千般冷地看他成話靶如今也解弄些些從渠歡喜從渠罵却笑樹頭老舅翁只能上樹不能下

狗勝貓

指月錄狗子無佛性勝貓十萬倍

貓兒突出

雲棲蓮池大師塔銘王侍郎宗沐問夜來老鼠唧唧說盡一部華嚴經師曰貓兒突出時如何王無語師自代云走却法師留下講案

一口咬死

黃檗山希運禪師頌云大雄山下大蟲像個貓兒狗子纔着擬議一口咬死滿堂喫酒糟漢老僧一棒打倒假道黃菓苦人何不去尋甘草

某甲溫州叟

隨隱漫錄玆荆叟住靈隱僧求掛搭不得一日五鼓久立

方丈忽問云何方狗子甚處貓見僧云某甲温州叟叟曰如何是祖師西來意答云五峰青更青叟曰便與掛搭別錄

貓二

逸周書世俘解武王狩禽虎二十有二貓二

貓牛

汲冢周書犛牛顏師古注作貓牛丹鉛錄云毛犀卽象也古人呼爲貓猪交廣人謂之猪神是矣

玃貓

詩經考有貓有虎傳云貓似虎淺毛者也 釋獸云虎竊毛謂之玃貓 雅翼云虎淺色謂之玃貓又詩稱韓土之

樂有貓有虎周書記武王之狩禽虎二十有二貓二則是虎之類也

詩說解頤貓似虎而淺色者爾雅謂之玃貓亦虎類也魴鱣麀鹿可以供食熊羆貓虎皆可供裘韓地之產隆如此他國莫及焉

梟鴟

梟鴟爾雅名土梟狀如母雞有斑文頭如鳩鴝目如貓目

天狗

山海經陰山有獸焉如狸而白首名曰天狗其音如貓事物紺珠天狗如狸白首音如貓食蛇

斑貓

陸璣詩疏莎雞黑身赤頭似斑貓

山海經北囂之山有鳥焉其狀如鳥人面名鷲鷲釋義鷲
鷲一作斑貓

本草綱目斑貓一作斑蝥所在有之七八月在豆花上甲
蟲也

狸骨帖

狸骨帖荀勗與寫狸骨方迺狸骨理勞方也王右軍臨之
謂之狸骨帖

李貓

通鑑李義府參知政事容貌溫恭與人語必嬉怡微笑而
狡獪忌克故時人謂義府笑中有刀又以其甚柔而害物

謂之李貓

佛狸

魏太武小字佛狸

人貓

南唐李德來號人貓

都指揮貓兒

留青日札成祖乘飛免戰交河中箭都指揮貓兒拔之

野貓兒

癸辛雜志學舍燕集必黠妓乃是各齋集正自出帖子用
齋印明書仰弟子某人到何處祇直本齋燕集專有一等
野貓兒卜慶等十餘人專充告報

女貓

安雅堂集臺灣賞番圖詩註番婦名膩新未嫁番女名貓已嫁番女名悅仙

貓塔

楚庭稗珠錄臺灣生熟二番少年以佩髑髏多者爲健謂之貓塔猶言好漢子也

山君

格物論虎山獸之君也狀如貓 李蘋湖曰虎名狸兒今南人猶呼虎爲貓

龍

聞見錄龐孝祖言提舉成都茶馬夏日坐後圃堂上忽聞

其後鐵鎖琅璫之聲遽窺牕外一物自小池中出龍形面如貓曳其尾石砌上鱗甲有聲少頃雷雨暴作失去孝祖疑世所畫龍皆非是予讀華嚴合論龍類最衆有如貓者孝祖所見乎

蛟

北夢瑣言南僧說蛟之形如馬蟻卽水蛭也蜀人號爲馬絆蛇頭如貓有一點白

貓蛇

楚庭稗珠錄粵東產貓蛇其音如貓

銜蟬奴

雪照堂雜誌古名馬有以蟲名者啣蟬奴

獾獾

廣東通志獾獾有黑有白有黃狸狀酷類貓而大亦高足而結尾捕鼠捷於貓也諸國皆產惟暹羅者良船估挾至常貓見而避之豪家每十金易一云

草上飛

庶物異名疏草上飛西番獸王也裔乘曰形大如犬身似斑貓性純不惡獅豹等獸見之卽伏於地此獸仁愛不惡而嚴

亞爾加里亞

坤輿外紀莫納木大彼亞國獸如貓名亞爾加里亞尾有汗極香阱於木籠汗沾於木乾之以刀削下便爲奇香

玉面狸

雁山志玉面狸形似貓面有白毛霜後肉美山中人以爲佳品諺云霜天玉面狸

靈貓

酉陽雜俎靈貓似麝生南海山谷如貓身亦曰鈴狸其臍香亦可充麝其毛可以爲筆寫書不鈍

香貓

丹鉛錄予在大理府見香貓如狸其文如金錢豹此卽楚辭所謂乘赤豹兮載文狸王逸注爲神狸者也

西使記契丹國香貓似土豹糞溺皆如香麝

野貓

本草綱目狸一名野貓有數種大小如狐毛雜黃色有斑如貓圓頭大尾者為貓狸善竊雞鴨有斑如貓虎而尖頭方口者為虎狸尾有黑白錢文相間者為九節狸皮可供裘領安陸州貢野貓花貓即此二種

棗貓

本草綱目棗貓棗樹上飛蟲也大如棗子青灰色有角

竹鼠

交州記竹鼠如小貓大食竹根出封溪縣

真臘鼠

真臘風土記鼠有大如貓者

仙蜂

女紅餘志仙蜂出林與山其形如貓愛花香聞有異香不遠千里必食之而後返

狸首

庶物異名疏蒲鴿狸首皆瓜名 范浚課畦丁灌園詩瓜疇準擬狸頭大草徑隄防馬齒繁

狸豆

爾雅樞音涉虎巢郭璞注云今虎豆纏蔓林樹而生莢有毛刺今江東人呼樞樞陳藏器曰豆子作狸首文故名

櫛

黃山志櫛俗作杉黃山老而巨者不讓蜀材錯文成繡原氏之子所謂狸首之斑女手之卷者若為此木咏矣

貓竹

竹譜竹之類有六十一大者謂之貓竹其萌之初出而最佳者謂貓兒頭

桂海虞衡志貓頭竹質性類筋竹

詞林海錯竹一名林簇卽袁公與越女試劒竹也曰防露

蜀中竹也曰金貓其節有金色

杭州府志大竹爲貓竹可破篾爲筐篋及織壁用

咸淳臨安志筍之類有貓頭筍

陸璣詩疏筍譜至八十五種有疏筍人面綿貓叢澁之屬

韓子蒼陵陽集湖南有大竹世號貓頭陳後山詩注云潭

州有貓兒頭筍

廣羣芳譜貓竹一作茅竹又作毛竹幹大而厚異於衆竹人取以爲舟

廣羣芳譜貓兒竹長沙有之下豐上細其筍甚美大者重十餘觔

貓兒刺

本草枸骨一名貓兒刺葉青翠而厚硬有五刺如貓之形故名

貓兒卵

本草白蕨一名貓兒卵多生竹林中根如雞鴨卵而長三五枚同一窠

貓兒殘

廣筆記極木一名十大功勞一名貓兒殘其子黑治積年
虛勞痰火健脾進食

貓兒眼睛草

庚辛玉冊貓兒眼睛草一名澤漆葉圓而黃綠頗似貓睛
故名貓兒眼拍莖有白汁粘人

貓腳跡草

庚辛玉冊貓腳鴨兒芹葉上有毛者真本草名貓莖草藥
方名貓腳跡續醫說名貓跡草

貓薊

通志又有一種小薊曰貓薊北方曰干針草以其莖葉多
刺故也花如紅藍花而青紫色多生於燕故曰薊門

貓耳朵

野菜譜貓耳朵正二月采搗爛和粉麩作餅蒸嘗之
耳草鄉人呼為綿絮頭 本草名佛

貓舌仙橋草

草藥方貓舌仙橋草春生苗莖微紫葉青勁而糙其形圓
如白果樣兩頭有尖大逾瓜子上有小白點延蔓着地生
根中喬起故名

貓兒眼

琅環記貓睛赤色有光者一名獅負

珍玩考寶石出西南諸郡縣狀如貓眼其中光如貓睛能
別時或尖或圓惟日午如一綫其價千金

後漢書卷五
解醒語西僧楊璉真伽啟掘宋帝諸陵理宗陵得穿雲琴
金貓睛爲徽龍肝石爲軫

說聽集錢塘金編修有一金鑲貓睛釵凡正午時眼如線
過則復圓

香宇外集巡按御史林潤抄沒嚴嵩江西家產載金廂玉
寶條環內有貓睛二十顆內黑貓睛一顆又金廂嵌珠寶
條鈎內貓睛二顆金摺絲帶環等項內貓睛二顆

文石

筠廊偶筆石大如松子青色白點光比貓兒睛因名爲賽
貓睛贊曰首飾之珍厥重貓睛維其似之迺錫嘉名

端石

游宦紀聞硯品中端石貴有眼眼之品類不一曰鸚鵡眼
鸚鵡眼了哥眼雀眼白雞眼貓眼菉豆眼各以形似名之
翠綠爲上黃赤爲下

鐵貓

癸辛雜識其鐵貓大者重數百觔常有舟遇風下釘而風
怒甚鐵貓四爪皆折舟亦隨敗極可異也

虞初新志海舶鐵貓重六千三百五十餘觔

貓兒墜

機杼上織絲之器具十二生肖之名其經上用繩縛小石
塊壓經邊者名貓兒墜

產異

二申野錄崇禎壬午山東婦人生一物雙貓首首有角角之巔有目身如人手垂過膝

貓叫聲

輟畊錄凡唱節病有貓叫聲

曲調

南九宮詞譜鶯貓兒

黃鶯見

琥珀貓兒墜

琥珀

貓兒墜

貓兒入御林

貓兒墜

貓兒逐黃鶯

黃鶯見

貓兒墜

梧桐花

貓兒墜

貓兒墜玉枝

玉交枝

貓兒來撥棹

墜

撥棹

貓兒拖尾

尾聲

貓兒呼出墜

出隊子

貓兒趕畫眉

見

墜畫眉

貓兒戲獅子

獅子序

木貓

元史郭昂傳播州張華聚衆容山昂率兵屠之山猺木貓土獠諸洞盡降

貓里霧

尤西堂外國竹枝辭載有貓里霧其國雨金沙諺云若要富須尋貓里霧

貓山

樵書冠山麓附一小山曰貓山

石貓

金華府志金華洞有石貓一石獅子一頭足尾皆具

望天貓

溫州樂清縣雁蕩諸峰有望天貓峰

花貓隄

常德府志花貓隄在清平門外二里許臨大江

貓見山

廣西志懷遠縣有貓見山在合水

貓見石

武夷志略貓見石在七曲山巔有石臥伏如貓下有數石如鼠

黃山志貓石在蓮花洞前奇峰嶙峋如束竹管邊合中罅當峰稍亞有石筍筍端石如貓踞兩耳直豎尾背俱全

貓尾港

明史自廣東欽州天津驛經貓尾港至瀟淪佛淘

貓兒橋

七修類稿吾杭正統丙子秋貓兒橋河水五色旬日方解杭州府志平津橋俗呼貓兒橋

稗史陳文龍興化人度宗朝狀元德祐末歸守本州北兵入閩生縛至杭幽於太學側貓兒橋巷

貓兒窩

嘉定王竹所有自貓兒窩至臺兒庄詞

貓兒莊

菽園雜記大同貓兒莊本遠人入貢正路

貓兒庵

志鮑公古社貓兒庵在石幢之南鮑公捨宅後所居

者

打貓社

臺灣紀畧商人所泊之社曰打貓社

貓兒旋

大剛山在臺灣之東南三十里狀如覆舟天陰埋影晴霽則見上有仙人跡鐵貓兒旋耳龍甕在焉相傳國有大事此山必先鳴

貓兒衙

武陵雜識慶春門內不百步有衙曰貓兒衙其地通南園

貓子潭

浙江衢州府龍游縣十里貓子潭

貓兒灘

廣東韶州府樂昌縣十五里貓兒灘極大最險

野貓壩

蠻司合誌四州威茂二州南路有鐵鑪溝外央橋野貓壩石蛇兒諸處俱諸番出入路也

銜蟬小錄卷六

藝文

仁和孫蓀意秀芬輯

鸚鵡貓兒篇

并序

唐閻朝隱

鸚鵡慧鳥也貓不仁獸也飛翔其背焉嚙啄其頤焉攀
 之緣之蹈之履之弄之藉之蹠蹠然此為自得彼亦以
 為自得畏者無所起其畏忍者無所行其忍抑血屬舊
 故之不若臣叨踐太子舍人朝暮待從預見其事聖上
 方以禮樂文章為功業朝野歡娛強梁充斤之輩願為
 臣妾稽顙闕下者日萬計尋而天下一統實以為惠可
 以伏不惠仁可以伏不仁亦太平非常之明證事恐久
 遠風雅所缺再拜稽首為之篇

霹靂引豐隆鳴猛獸噫氣蛇吼聲鸚鵡鳥同資造化兮殊
粹精鸚鵡毛翡翠翼鸚鵡延頸鷓雞弄色鸚鵡鳥同稟陰
陽兮異埏埴彼何爲兮隱隱振振此爲何矣綠衣翠襟彼
何爲兮窘窘蠢蠢此何爲兮好貌好意彷彿兮佯佯似妖
姬躡步兮動羅裳趨趨兮蹒蹒若處子迴眸兮登玉堂爰
其獸也安其忍背其脇距其胸與之放曠浪浪兮從從容
容鈎爪鋸牙也宵行晝伏無以當遇之兮忘味搏擊騰擲
也朝飛暮噪無以拒逢之兮屏氣由是言之貪殘薄則智
慧作貪殘臨之兮不復攫申是言之智慧周則貪殘囚智
慧犯之兮不復憂菲形陋質雖賤徵皇王顧遇長光輝離
宮別館臨朝市妙舞絳絃雜官徵嘉喜堂當前景福內合

貓鼠議

唐崔祐甫

一作和歡殿上明光裏雲母屏風文彩合流蘇斗帳香煙起
承恩宴盼接宴喜高視七頭金駱駝平懷五尺銅獅子國
有君兮國有臣君爲主兮臣爲賓朝有賢兮朝有德賢爲
君兮德爲飾千年萬歲兮心轉憶

右今日日中使某宣進上以籠盛貓鼠示百寮臣聞天生
萬物剛柔有性聖人因之垂範作則禮記郊特牲篇曰迎
貓爲其食田鼠也然則貓之食鼠載在禮經以其除害利
人雖微必錄今此貓對鼠不食仁則仁矣無乃失於性乎
鼠之爲物晝伏夜動詩人賦之曰相鼠有體人而無禮又
曰碩鼠碩鼠無食我黍其序曰貪而畏人若大鼠也臣旋

觀之雖云動物異於麋鹿麀兔彼皆以時殺獲爲國之用此鼠有害亦何愛而曲全之貓受人養育職旣不修亦何異於法吏不勤觸邪彊吏不勤扞敵又按禮部式具列三瑞無貓不食鼠之目以茲稱慶臣所未詳伏以國家化洽治平天符薦至紛綸雜沓史不絕書今茲貓鼠不可濫厠若以劉向五行傳論之恐須申命憲司察聽貪吏誠諸邊候無失徼巡貓能致功鼠不爲害

貓相乳說

唐韓愈

司徒北平王家貓有生子同日者一母死焉有二子飲於死母母且死其嗚咿咿其一方乳子若聞之起而若聽之走而若救之銜其一置其棲又往如之返而乳之若其子然噫亦異之大者夫貓畜也非性於仁義者也其感於所畜者乎

貓虎說

唐來鵠

農民將有事於原野其老曰遵故實以全其秋庶可望矣乃具所嗜爲獸之羞祝而迎曰鼠者吾其貓乎豕者吾其虎乎其幼感曰迎貓可也迎虎可乎豕盜於田逐之而去虎來無豕餒將若何抑又聞虎者不可與之全物恐其決之之怒也不可與之生物恐其殺之之怒也如得其豕生而且全其怒滋甚射之獲胡化切之猶畏其來况迎之邪噫吾亡死日矣或有決於鄉先生先生听然而笑曰爲鼠迎貓爲豕迎虎皆爲害乎食也然而貪吏奪之又迎何物焉

由是知其不免乃撤所嗜不復議貓虎

養狸述

唐舒元興

野禽獸可馴養而有裨于人者吾得之狸余愛其能息鼠竊近乎正且勇嘗觀虞人有生致者因得諸歸置新豐里客舍嘗闔關實竇縱於室中潛伺之見軒首引鼻似得鼠氣則凝蹲不動斯須果有鼠數十輩接尾而出狸忽躍起豎瞳迅金文毛磔斑張牙呀爪割泄怒聲鼠黨帖伏不敢竄瞬視間羣鼠肝腦塗地迨夜背缸潛窺室內洒然而吾得高枕坦臥絕瘡疖之憂皆斯狸之功乎

蓄狸說

宋黃庭堅

敬亭叟之家毒於鼠暴穿桷穴塘室無全宇咋齧筐篚帑無完物乃賂於捕野者俾求狸子蓄于家飾茵以棲給鱗以茹撫育之厚如字諸子其攫生搏飛舉無不捷鼠攝而殄影暴腥露膊羶縱橫莫犯矣然其野心常思逸於外罔以余育為懷一旦怠其繼踰垣越宇倏不知所逝叟惋且惜涉旬不弭引農子聞之曰野性匪馴育而靡恩非獨狸然人亦有旃梁武于侯景寵非不深矣劉琨于匹殫情非不至矣既負其誠復反厥噬嗚呼非所蓄而蓄孰有不叛者哉

貓說

明薛文清瑄

余家苦鼠暴乞得一貓形魁然大爪牙鋸具利私計鼠暴當不復患矣以未馴維繫之羣鼠聞其聲窺其形類有能

者屏不敢出穴者月餘日既而以其馴也解其維繫適觀
出殼雞雛啾啾焉遽起捕之比逐已得下咽矣家人欲執
而擊之余曰無庸物之有能者必有病噬雞是其病也獨
無捕鼠之能乎遂釋之已而怲怲泯泯饑哺飽嬉一無所
爲羣鼠復潛視以爲彼將匿形致已也猶屏伏不敢出既
而鼠窺之益熟覺其無他異遂厯穴相告云彼無爲也遂
偕其類復出爲暴如故余方怪甚然復有雞雛過堂下者
又亟往捕之而走追則噬者過半矣余之家人執而至前
數之曰天之生材不齊有能者必有病舍其病猶可用其
能也今汝無捕鼠之能而有噬雞之病真天下之棄材也
哉遂答而放之

罵貓文

明胡侍

家有白雄雞畜之久矣乃者棲於樹顛而橫遭貓啗乃呼
貓俾前而罵之曰咄汝貓汝無他職職在捕鼠以茲大蜡
古也迎汝不鼠之搗曰職不舉而又司晨之禽焉爲是食
計汝之罪匪直不職而已也咄汝貓相鼠有類實繁厥徒
或登承塵或撼戶樞或緣榻蕩几或喻尊舐盃或覆奩孔
櫝或齧圖褫書汝于是時儻伺須臾卽不踰房闥而汝之
腹以飫人之害以除矣其或不然則但據地長號咆哮噫
烏雖不鼠輩之克殄而聲之所習鮮不縮且遁矣而寂不
汝聞杳焉其徂吾不意汝窺高乘虛越垣厯廚緣幹超枝
攀柯推莠而勞苦於一雞之圖鼠爲人害汝則保之雞具

五德汝則屠之鼠也奚幸雞也奚辜雖則汝有不若汝無
無汝則鼠之害不益于今而雞之禍吾知免夫

貓說

明李漁

家常所畜之物雞犬之外又復有貓雞司晨犬守夜貓捕
鼠皆有功於人而自食其力者也乃貓爲主人所親暱每
食與俱尚有聽其牽帷入室伴寢隨眠者雞棲於埽犬宿
於外居處飲食皆不及焉而從來敘禽獸之功談治平之
象者則止言雞犬而並不及貓親之者是則畧之者非親
之者非則略之者是不能不惑於二者之間矣曰有說焉
暱貓而賤雞犬者猶癖諧臣媚子以其不呼能來聞叱不
去因其親而親之非有可親之道也雞犬三物則以職業

爲心一到司晨守夜之時各司其事雖豢以美食處以曲
房使不卽彼而就此二物亦守死弗至人之處此亦因其
遠而遠之非有可遠之道也卽其司晨守夜之功與捕鼠
之功亦有間焉雞之司晨犬之守夜忍饑寒而盡瘁無所
利而爲之純公無私者也貓之捕鼠因去害而得食有所
利而爲之公私相半者也清勤自處不屑媚人者遠身之
道假公自爲密邇其君者固寵之方是三物之親疎皆自
取之也然以我司職業于人間亦必効雞犬之行而以貓
之舉動爲戒噫親疎可言也禍福不可言也貓得自終其
天年而雞犬之死皆不免于刀鋸鼎鑊之罰觀于三者之
得失而悟居官守職之難其不冠進賢而脫然于宦海浮

沉之累者幸也

貓說

國朝 朱長儒

余家多鼠患藏書多被齧蝕隣家有貓乞得之形魁然大爪牙甚鉅始至羣鼠屏息穴中私喜鼠患自此弭矣迨月餘患復作終夜咋啞有聲余怪而伺之則貓與鼠甚比同寢處若倡和然伺其故貓性貪嗜鮑魚腥中廚所庖見必竊食鼠覺其然凡貓之所嗜鼠必豫儲以遺之貓啗而德之遂一任所爲鼠始以形之大也而畏貓旣以所嗜嘗貓終則狎貓豢貓利有貓其出而爲患也益無忌余乃嘆曰甚者貪之毒也使貓無所竊鼠其敢嘗之耶貓旣先鼠爲竊其能禁鼠之羣竊耶畜貓本以捕鼠而今反以導鼠且

昵之爲一是鼠魁也曷若去鼠魁而羣鼠之患猶或少弭耶乃命童子鎖其項繫其足數而扶之沉之于交衢之溷

討貓檄

黃之駿

之駿好讀書左圖右史等諸南面百城豢一貓用以防鼠視其色斑爛如虎羣以爲俊物置諸書架旁終日憨臥喃喃喃喃若宣佛號或曰此念佛貓也名曰佛奴鼠耗于室見佛奴始猶稍稍斂跡繼跳梁失足四體墮地佛奴撫摩再四導之去嗣後衆鼠俱無畏意成群結隊環繞于側一日踏肩登背竟嚙其鼻血涔涔不止之駿乞刀圭以治適學師沈桐威過之叱曰畜貓本以捕鼠乃不能翦除是溺職也反爲所噬是失體也正宜執鞭箠以問之何以藥爲

命之駿作檄文以討之其檄曰

捕鼠將佛奴者性成悞懦貌托仁慈學雪衣孃之誦經冒尾君子之守矩花陰晝嬾不管翻盆竹簟宵慵由他鑿壁甚至呼朋引類九子環魔母之宮疊背登肩六子戲彌陀之座而猶以老僧入定不見不聞傀儡登場無聲無臭優柔寡斷姑息養奸遂占滅鼻之凶反中磨牙之毒閻羅怕鬼掃盡威風大將怯兵喪其紀律自甘唾面實爲縱惡之尤誰生厲階盡出沽名之輩是用排楚人犬牙之陣整蔡州騾子之軍佐以牛箠加之馬索輕則同於執豕重則等於鞭羊懸諸狐首竿頭留作前車之鑒縛向麒麟植上且觀後効之圖共奮虎威勿教兔脫

貓彈鼠文

毛序始

臣貓言臣以賁皇之同姓爲章惇之後身蒙被私恩獲居禁近斲睡臥榻之側獨肯見容高踞華屋之顛初不爲怪甚且引登席上援置臺中食必分肥坐或加膝搏擊斃能言之鳥竟免詆訶盤旋亂將覆之棋輒承嘉悅凡諸異數超越同儕臣何敢辭口舌之勞致有負爪牙之任故常效張湯之磔不欲如義府之柔務俾么麼之黨類盡除方保公家之器物無損豈彼自矜五技訖持兩端嘖嘖者不厭煩訛訛焉且惑聽臣請暴其鬼蜮之狀絕此侏儻之聲謹按搜粟都尉兼掠剩使襲封同穴侯鼠子本係小醜之尤冒稱諸蟲之老於辰支雖居首在物類爲最微賦形旣消

阻不颺稟性復狡獪莫比光天化日之下暫爾潛踪暗室
屋漏之中公然逞惡營窟穴以藏匿時爲兔脫之謀畏首
尾而伏行更甚狗偷之態漫云有體誰爲無牙速訟遂已
穿墉鑽隙何曾忘壁甚至傷犧牛之角不顧卜郊學城狐
之奸遽思憑社糞污蜂蜜實坐黃門之譖言齒嚙馬鞍幸
賴蒼舒之善解尤可恥者從乞兒以遊戲都市巧取金錢
見士人而拱揖庭堦故爲妖妄或渡河而銜尾奚堪侶江
渚之魚蝦至墜地而屠腸詎能及淮南之雞犬縱教幻化
誰復肯爲其肝相彼貪饕何時可滿其腹惡難悉數罪不
容誅非斷以老吏之獄辭曷殲夫若輩之族屬是使食苗
食黍終致嘆於魏風而在廁在倉恒興嘆于秦相也伏惟
箱斯甘口燭其黠心敕付臣貓追捕如律庶皇甫擊楊廢
之首譴責無逃蕭妃扼武壘之喉報施不爽臣愚莽于冒
威嚴仰候指揮制曰爾貓名雖不列地支種實傳來天竺
念爾祖崇祀于八蜡旣與虎而同迎乃嗣孫奮跡于三危
嘗以獅而爲號惟茲鼠耗叵耐鴟張孰曰苗頑正資鷓逐
爾昨暫出彼卽肆凶窺甕翻床任疾呼而不止嚙書遺矢
欲安寢而無從爾無忌器不投定須聞聲卽捕尚防抱頭
而竄勿容泣血以思用假便宜恪共常職

義貓記

徐季方

夫四足有毛者謂之獸總屬地產豢養者謂之畜周制庖
人供六畜馬牛羊雞犬豕六獸麋鹿狼麇兔野豕辨其生

死鮮薨之物以供祭祀賓客之用若貓雖屬豢養之畜止備捕鼠之用陸佃云鼠害苗貓捕之故字從苗禮記迎貓亦爲其食田鼠也然未有如山右富人所畜之貓形異而靈且義也其睛金其爪碧其頂朱其尾黑其毛白如雪富人畜之珍甚里有貴人子見而愛之以駿馬易不與以愛妾換不與以千金購不與陷之盜破其家亦不與因攜貓逃至廣陵依于巨商家亦愛其貓百計求之不得以鴆酒毒之其貓與人不離左右鴆酒甫斟貓卽傾之再斟再傾如是者三富人覺而同貓宵遁遇一故人匿于舟後渡黃河失足溺水貓見主人墮河叫呼跳號撈救不及貓亦投水與波俱汨是夕故人夢見富人云我與貓不死俱在天

妃宮中天妃水神也故人明日謁天妃宮見富人屍與貓俱在神廡下買棺瘞之埋其貓於側嗚呼蟲魚禽獸或報恩于生前或殉死于身後如毛寶之白龜思邈之青蛇袁家兒之大獐犬楚重瞳之烏騅馬指不勝屈若貓之三覆鴆酒何其靈呼救不得殉之以死何其義又豈畜類中所多見者耶然其人以愛貓故被禍破家流離異域復遭鴆毒非貓之幾先有以傾覆之其不死于毒者幾希矣及其人失足河流叫跳求援得相從于洪波之中以報主人珍愛之恩以視夫爲人臣妾患至而不能捍臨難而不能決者其可媿也夫其可媿也夫

檄狸奴文

梁同書

家有常畜維貓與狗貓職在捕狗職在守狗義而勤貓也則否貪爾腐糧日爾之赴同眠鼠穴而不汝咎溪鮮爲餐勃荷爲酒秋榻分擅春閨伴繡憐爾蒙茸跳蟲遁藪薰以桃枝敷以草蓐婢倦揣探奴愁抖擻爾嬾且驕撩天展肘陽生之初陰動而後或羣或友相呼交吼厥類實繁一歲再穀東家西家餌汝則受鱗鱗屋瓦掀翻牝牡捎花落茵爪樹成結黼觸冰甌饒窺星罨蹴我鳳子嚇我鸚母爾性胡殘主恩良厚倖哉狸奴凡畜誰偶韓盧宋鵠不聞聘取獨爾之來裹鹽穿柳號充獅兒覲尊虎嘒亦踞几按亦沾升斗附熱門東乞憐座右擁鼻騰聲容頭疾走生高明家死婦女手酣豢一身竟保汝壽昔有李貓宜其比醜

檄城隍神驅貓鬼文

彭兆孫

年月日具官某謹以清酌庶羞昭告於城隍之神曰昔者魚脯鯢敝齊君立五吏之祭樂車寓馬漢后啟三垓之垓長陵宛若亦奉神君雲陽卍艸尤崇巫祝迎年畫法前典攸存逮觀右賢左戚之朝虎武龍文之治天鏡照而黎邱滅跡乾暉煜而靈場失威六席六綵郊社无愆諸逐諸巖牲牢悉罷苟有慶忌于螭之螿倍阿鮭蠶之燒嚇覲嗾巫營葦燭餅必將驅甲作命單偃棒用拾櫬物窮五百行鑿齒疇華之殛落白蜺嬰弗之仙未有曠陽罔象添竊瓊茅澤豕山魚寅儀金累者也茲拜地匝岑崑風成壑果桓葱莊胥頗擅五兵楚鬼越祲元聞比屋惟有貓鬼之祀實類

豬都之妖獨孤陀奉而稱神徐阿尼憑而爲廟流傳弊俗
漸染巫風像做煙蘿沈水薰而鷲似飭叨芝蓋羽葆合而
華敷效脈血拇曠眩蒙供之面女丁婦壬眇騞治亥之容
子夜寂而蘭膏明丙符焚而荆幡動遂乃挾邪作蠱鬼笑
靈譚不枕戶樨遽遭蹠首直排權闥有類儀身羅帷卷舒
人醉摩邪陀果楚雲誕幻春酣毗瑟笈天浹席蜚生流庭
縈走似丹朱之憑房后甚公嫗之娶唐山幾使戶飲滌泉
家芟貞樹女嫗七十二化有此閃屍洛陽千五百神死其
妖露際此金科照律玉燭含光凡夫東陵聖母石印郎君
駱驩緬匿之法黃公粵祝之儔罔不匝宇潛踪綿區戢影
由庚載作左道咸誅豈茲小鬼之神乃假巨人之跡某職

當守土氣涌如山感悅驚龍久清陰訟妖雲悖雨詎道王
章業已盡械婆羅窮搜輦鐸率弩父亭公之衆奮桃更菱
索之威祝融一怒繪畫飛煙金布三申米師褫魄猶恐沈
履竈髻陽律難施騰簡強梁冥誅攸賴用修蘋藻冀降明
靈伏望彈壓氛祲劃開聲勢爲忖留惡覷爲長房厲訶淬
刃于度剡之山傳札于葛陂之老務俾却驢山鼠悉就殲
夷天狗獷羊同歸柳繼庶幾眷言婉變救月弓彎齟其姦
猖獲雄兆協鄉社絕八通之道閭閻開六慎之門畏子不
奔分奠下民之庇癘助我張目不求神聽之和平

徐
輝
少
錄

卷
六

三



